

Avammut tunioraaneq pillugu Naalakkersuisunut susassaqtunullu sumulluunniit attuumassuteqanngitsumik nalilersueqqissaarluni inassuteqaasiortartussamik, Avammut Tunioraaneq pillugu Siunnersuisooqatigiinnik kingusinnerpaamik UPA2020-imi pilersitseqqullugit Naalakkersuisut peqquneqarnissaannik siunnersuut. Ilanngullugu siunnersuutigineqarpoq, avammut tunioraarnerup siuarsarneqarneranut suliniutit ingerlaavartumik nalilersorneqartarnissaat siunnersuisooqatigiit suliassaannut ilaatinneqassasoq.

(Inatsisartuni ilaasorta, Karl-Kristian Kruse)

Akissuteqaat

(Inuussutissarsiornermut Nukissiuuteqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasorta Karl Kristian Kruse aalajangiiffigissassatut siunnersuutaa pillugu qutsavigissavara.

Ukiuni makkunani misigaarput aningaasarsiornikkut ineriartorneq qaffariaateqartarnernik malunnaatilinnik imaqartoq, suliffeqarfiillu nutaat pilersinneqartarneri. Aningaasarsiorneq pillugu siunnersuisooqatigiit taamaasillutik naatsorsuutigivaat 2019-imi BNP 3 %-it missaannik qaffariaateqassasoq.

Takornariat amerliartuinnartut nunatsinnut tikittalerput. 2017-imi nunanit allaniit takornariartut 84.299-iupput, tamannalu 2015-imut sanilliullugu tassa qaffariaat 10 %-it missaanniippoq. Aamma timmisartunut ilaasut 2017-2018-imi amerleriaateqarput. Taamaattumik inuussutissarsiorneq amerlasuutigut ingerlalluarpoq.

Inuussutissarsiorneq avammut niuernikkut suliniutit amerlanersaat pisortat avataanni inuussutissarsiutitigut siuarsaanissamut ingerlatseqatigiiffinni inissimapput. Pineqarpullu ingerlatseqatigiiffiit, assersuutigalugu Greenland Business, Greenland Venture aamma Visit Greenland. Ilanngullugulu eqqaasinnaavara nunani allani sinniisoqarfigut Naalakkersuisut sinnerlugit avammut niuernikkut siursaataasussanik suliniuteqartarmata. Sinniisoqarfittalu suliaat taanna ukiuni aggersuni suli pingaarneruleriartussaaq.

Greenland Business-ip isumagisarai inuussutissarsiorneq avammullu niuernikkut siursaaniarnermik suliassat amerlasuut, inuussutissarsiortunut tunngatillugu suliaasut. Aaqquissuussinerullu amerlasuut Greenland Business-imit avammut niuernikkut siursaaniarnermut atatillugu ingerlanneqartut ilaat eqqaaneqarsinnaasut tassaapput siunnersortit professionel-iusut atorlugit tapersiisarneq, nioqqutissiassanik ineriartortitsinernut tapiissuteqartarneq, kalaallit inuussutissiaannik siursaanermit tapiissuteqartarneq, kiisalu

sermimik aamma imermik nioqqutissiuulerniarluni suliniutitut aamma takornariartitsinermik suliniutitut tapiissuteqartarnej. Greenland Business-ip allaffissornikkut aquppaa aningaasanik annikitsunnguanik attartortitsisarnermik aaqqissuussineq taaguuteqartoq - mikrolånsordning, ukiup matuma siuliani Inatsisartuni akuersissutigineqartoq, ukiunilu ukunani aatsaat taamak amerlatigisunik qinnuteqaatinik tigusaqartarpugut, tamatumalu erseqqissarpaa pisariaqartitsisugut tapiissuteqartarnikkut aaqqissuussinernik assigiinngiiaartunik.

Inuussutissarsiornikkut siuarsaanitsinni siuarsaaqataasoq pingaaruteqartoq tassaavoq takornariartitsisarnermut atatillugu ingerlatseqatigiiffiuterput Visit Greenland. Visit Greenland pissutaasut pingaarnarpaat ilagaat ukiuni makkunani annertuumik takornariartartut qaffariarnerannut. Tamannalu qularnaarneqartarpoq nunarsuarmioqatsitta akornanni ingerlaavartumik ussassaarisarnikkut, takornariartitsisarnernut saqqummersitsiviusartorpassuarni ataatsimeersuartitsisarnernilu. Tamakkunani nunarput saqqumilaartinneqartarpoq nunatut takornariarfigissallugu assut pilerinaateqartutut. Visit Greenland nunatsinnipeqatigiiffik, , isumagisaralugulu najukkani assigiinngitsuni ingerlatsisuusut nunatsinnilu tamarmi qitiusumik takornariartitsisarnikkut ingerlatsisuusut nunarsuarmiut takornariartitsisarnikkut ingerlatsivissuutitut attaveqartuunerat.

Uanga nammineq Naalakkersuisut sinnerlugit 2018-imi nunat avannarliit killiit takornariartitsisarnikkut saqqummersitsivianni - Vest Norden Travel turistmessen – Island-imi ingerlanneqartumi peqataaninni ersarissumik malugaara takornariartitsisarnermik ingerlatsisut akornanni siunissamut sammisumik isumalluarnerat annertoq. Tamannalumi aamma ersarissumik naqissuserneqarpoq, nunatsinniit peqataasut 70-init ikinnerunngitsut najuunnerisigut.

Ineriartornerlu pitsaasoq tamanna aamma uuttorneqarsinnaavoq akunnittarfinnik unnuisarfinnillu allanik nunatsinni maanna sanaartortoqarneratigut.

Kiisalu naatsorsuutigineqarpoq timmisartut mittarfiisa nutaat 2.200 miiterinik takissusillit Ilulissani aamma Nuuummi sananeqarnerisigut, aammalu Qaqortumi 1.500 miiterisut takissusillip sananeqarneratigut takornariartitsinermi suli annertunerusumik ineriartortoqarumaartoq. Taamaasillunilu takornariartitsinermik ingerlatsinermi uuttuutissat pitsaasuupput, taamalu - Island-imisulli, - takornariartitsinermik inuussutissarsiorneq inuussutissarsiuataaleriartorpoq pingaaruteqarluinnartoq.

Tamatumunngalu tapiliullugu Naalakkersuisut sinnerlugit erhvervsministeri isumaqatigiissuteqarfigaara, killiliussassanik pilersitsisumik, naalagaaffeqatigiinnermi suleqatigiilluarnikkut, inuussutissarsiornikkut ineriartortitsinitsinni suli aammaarluta kivitseqqinnissatsinnik, minnerunngitsumillu avammut niuernitta ukiuni aggersuni nukittorsaqqinnissaanik.

Isumaqatigiissuteqarnerup kinguneraa immikkoortitsisoqassasoq 220 mio. kr.-inik, inuussutissarsiutinik nutaanik pilersitsiortorpeq avammullu niuernerput suli siuarsaqqikkumallugu. Aningaasaliissutit, annertunerpaamik danskit naalagaaffiannit aningaasalersorneqartut avinneqassapput Greenland Venture aamma danskit

ineriartortitsinerimut aningaasaateqarfiata – Vækstfonden-ip akornanni, suliniutini qitiullutik ingerlatsisuusussaasuni.

Aalisarneq ataatsimut isigalugu ukiuni kingullerni ilorraap tungaanut ineriartorsimavoq. Taamaammat aalisarneq ukiuni arlariinni agguaqatigiisillugu aalisakkatigut uumasullu qaleruallit qaffariarsimanerannut tunngaveqarluni. Taakkulu tungaatigut aamma inuussutissarsiornermut tapiissuteqarnissamik aamma periarfissaqarluni, soorlu, atorniarnit, tapiissutit aamma isateriaannarnut tapiissuteqartoqarsinnaalluni. Assersuutigalugu aalisariutit nutarternissaammut aamma misileraalluni suliniutinut nutaanut, misileraalluni aalisarnernut imaluunniit assigisaannut tapiissutinik qinnuteqartoqarsinnaavoq, ineriartortitsinissanut iluaqutaasinnaasunik aamma aalisakkanik isumalluuteqarnermut atorluanaanissamut aallaaveqartumik periarfissaqartitsisumik.

Naalakkersuisut, soorluli akissutinni isumaqatigaat siunertaasoq, tassalu nunatsinni inuussutissarsiornikkut ineriartortitsisoqarnissaa aammalu nunatsinniit avammut niuernitta ineriartortinneqarnissaa. Kikkummi tamarmik soqutigisarivaat tapiissutinut aqqissuussat, siunertarineqartunut sunniuteqarnissaat.

Taamaattoq pingaaruteqarpoq eqqaamassallugu inuussutissarsiornikkut avammullu niuernikkut suliniutinik siuarsaaniarneq ullutsinni ingerlatseqatigiiffinnut arlaqartunut inissinneqareersimammat, soorlu Greenland Business, Visit Greenland aamma Greenland Venture allallu taamaalillutik ingerlanneqareerlutik taakkunanngalu nalilersorneqartarlutik.

Aammattaaq pingaaruteqarpoq inuussutissarsiornerup nutaap ilusissaa, danskit oqartussallu isumaqateqarfigiissutaasimasoq, sunniuteqarnissaa eqqarsaatigalugu piffissaqartariaqarmat.

Suliniutit ingerlareersut taamaammat ataqqineqartariaqarput killiliussallu iluanni suliarineqartariaqarlutik.

Naalakkersuisut taamaattoq isumaqatigiissutigaa, ingerlaavartumik inuussutissarsiornermut siursaanissamut suliniutinut tunngatillugu nalilersuisoqartuarnissaaq, inuussutissarsiorneq-aalisarnerullu susassaqarfiit eqqarsaatigalugit, aammattaaq isumaqatigineqarpoq, soorlu siunnersuuteqartumit saqqummiunneratuut, naliliineq tamanna ingerlataqartut pioreersut peqatigalugit ingerlanneqartarnissaa.

Aammattaaq avammut tunisisarneq eqqarsaatigalugu attaveqanngitsumik misissueqqissaartoqarsinnaaneq aamma innersuussisoqarsinnaanera atorneqarsinnaavoq, nunat assigiinngitsut akornannut tuniniaaneq eqqarsaatigalugu.

Tamannalu tunuliaqutaralugu Naalakkersuisut siunnersuut taperserpaat, oqallilluartoqarnissaalu qilanaaralugu.